

НА ЛИТИИ СТИХИРЫ ПРАЗДНИКА: ГЛАС 1:

Вётхий деньми, Иже закон древле в Синаи дав Моисею,/ днесь Младенец видится/ и по закону, яко закона Творец,/ закон исполняя, во храм приносится,/ и старцу даётся./ Прием же Сего Симеон праведный/ и, обещаний событие видевав совершаемое, радостно вопиаше:/ видеша очи мои еже от века таинство сокровенное,/ напоследок дней сих явльшееся,/ свет, разоряя неверных языков/ омрачение и славу дая новоизбранному Израилю;/ темже отпусти раба Твоего от союз сея плоти/ к нестареемому и чудному некончаемому животу, // подая миру велию милость.

Днесь древле Моисею в Синаи закон подавый/ законным повинуется велением,/ нас ради, яко Милосерд, по нам быв./ Ныне Чистый Бог яко Отроча Свято, ложесна разверз чистыя,/ Себе Самому яко Бог приносится,/ законныя клятвы свободяя // и просвещая души наша.

Глас 2:

Емуже вышнии служителие с трепетом молятся,/ долу ныне Симеон вещными руками приемь,/ Бога человеком соединитися проповеда,/ и Человека Небесна Бога видяй,/ отлучаяся сущих на земли, радостно взываше:/ Иже во тьме сущим Невечерний Свет открываяй, // Господи, слава Тебе.

Днесь Симеон на руки Господа славы подымлет,/ Егоже под мраком первее Моисей виде,/ на горе Синайстей скрижали дающа ему./ Сей есть, Иже во пророцех глаголяй и закона Творец./ Сей есть, Егоже Давид возвещает, Иже всем страшный, // имей велию и богатую милость.

Священнаго священная Дева принесе во святилище святителю,/ простер же руке, Симеон прият Сего, радуясь,/ и во-

зопи: ныне отпускаеши раба Твоего, Владыко, // по глаголу Твоему с миром, Господи.

Зиждитель Небесе и земли / на руках ношашеся святым Симеоном старцем днесь, / той бо Духом Святым глаголаше: // ныне свободихся, видех бо Спаса моего.

Днесь Симеон старец во храм входит, радуяся духом, / Законодавца Моисеева и Исполнителя закона на руки восприяти. / Он убо мраком и гласом неявленным Боговидец сподобися быти, / покровенным лицом евреев неверная сердца изобличи, / сей же Первовечное Слово Отчее воплощенное понесе / и языком откры Свет, Крест и Воскресение. / И Анна пророчица показася, / Спаса Избавителя Израилю проповедающе. / Тому возопиим, Христу Богу нашему: // Богородицы ради помилуй нас.

Слава: глас 5:

Испытайте писания, / якоже рече во Евангелиих Христос Бог наш, / в них бо обретаем Того, раждаема / и пеленами повиваема, / в яслех полагаема и млеко питаема, / обрезание приемлюща и Симеоном носима, / не мнением, ни привидением, но истиною миру явльшася. / К Немуже возопиим: // Превечный Боже, слава Тебе.

И ныне, глас тойже:

Ветхий деньми, младенствовав плотию, / Материю Девою в церковь приносится, / Своего закона исполняя обещание, / Егоже Симеон приим, глаголаше: / ныне отпускаеши с миром, по глаголу Твоему, раба Твоего, // видеша бо очи мои спасение Твое, Святый.